



Atuarfik pillugu Inatsisartut inatsisaat nr. 15, 3. December 2012- meersoq naapertorlugu Naalackersuisut nalunaarummik saqqummiusseqqullugit peqquneqarnissaannik Inatsisartut aalajangiiffigisassatut siunnersuut. Nalunaarummi aalajangersagaqassaaq nalilersuineranut immersugassamik ilitsersuutitalimmik pilersitsisoqassasoq pitsaasutsimik nalunaarusiortarnermut ilaatinneqartussamik, meeqqat atuarfianni siulersuisuisut, pisortat ilinniartitsisullu ineriartortitsinerminni atortagassaannik. (Inatsisartunut ilaasortaq Jens NapätôK´ Partii Naleraq) (siullermeerneqarnera)

Demokraatit Inatsisartunut ilaasortaq Jens NapätôK´, Partii Naleraq, siunnersuuteqarneranut qutsavigaat.

Meeqqat siunissaraagut, Meeqqallu atuarfiat meeqqatta siunissarissaarnissaanut pingaaruteqartorujussuuvoq. Tassani atuagarsornikkut inooqataanikkullu ineriartortussaapput. Tassani suleqatigiinnermik ilinniartussaapput.

Taamaattumik aamma pingaartuuvoq, Meeqqat atuarfiata piumasaqaatinik eqquutsitsinissaa, aammalu sapinngisamik qaffasissumik ingerlanneqarnissaa. Tassunga pingaarutillit ilagaat naliliinerit pitsaassutsimullu nalunaarusiornerit. Sakkut taakku ullumikkut pioreerput, Meeqqat atuarfiannut inatsimmi atuuttumi ersarissumik allassimallutik, tassa atuarfiup pisortaata ukiut tamaasa pitsaassutsimut nalunaarusiornissaa, kommunalbestyrelsinut nassiunneqartussamik. Tassanilu aamma takuneqarsinnaavoq, pitsaassutsimut nalunaarusiaq minnerpaaffimmigut sunik imaqassanersoq.

Tamanna tunngavigalugu Demokraatit isumaqanngillat, taassumunnga nalunaarummik sananissaq pisariaqartuusoq. Taassumalu saniatigut uparuarusupparput, kommunip suliassarimmagu, taamaattumillu kommunit ataasiakkaat namminneerlutik aaliangertussaallugu, pitsaassutsimut nalunaarusiami annertunerusumik immikkuualuttunik ilanngussisoqartassanersoq. Isumaqanngilagut, Namminersorlutik Oqartussat ullumikkut inatsimmi piumasaqaataareersut saniatigut akuliuttariaqartut.

Taamatut oqaaseqaateqarluta siunnersuutip itigartinneqarnissaa innersuussutigaarput.